

順昌縣志卷二十四

雜錄

事有難分品類無可歸宿而棄之又可惜者悉載於此

唐懿宗時樂人廖鎮爲吉王府司馬第業爲睦王府司馬至宋朝廖剛德明以理學顯廖中廖天覺廖邦傑以名臣顯廖澄以忠烈顯廖遜廖執象廖嶢廖衡廖伯憲廖駒以文學顯其子孫今尙繁衍云

閩書

宋順昌縣吳璋爲兒時從師鄉塾有相者徧視諸生獨指璋曰此郎有朝帝骨年三九當登桂籍後璋學成登進士第適二十七歲符相者之言

府志

朱子與廖子晦書云東坡在湖州被逮時面無人色兩足俱軟不能行求入與家人訣而使者不聽雖伊川先生謫涪陵時亦欲入告叔母而不可得惟陳了翁被逮聞命卽行使人駭之請其入治行裝而翁反不聽奇哉奇哉願子勉旃

晦翁文集

順昌縣志

卷二十四

宋閩人生子多者至第四子率皆不舉爲貧產不足贍也若女則不待三往往臨蓐以器貯水纔產卽溺之謂之洗兒建劍尤甚四明俞偉仲寬宰劍之順昌作戒殺子文召諸鄉父老爲衆所信服者列坐廡下以俸置醪醴親酌而侑之出其文使歸諭其鄉人無得殺子歲月間活者千計故生子多以俞爲小字轉運判官曹輔上其事朝廷嘉之仍令再任復爲立法推行後仲寬因被差他郡還邑有小兒數百迎於郊雖古循吏未之有也其事蹟互見名宦傳今南順等邑貧家子輒有年逾四五十歲未娶者詢其故曰此地女少難聘或有挾金至省城求婦者則茲郡溺女之風未泯何也有司誠能如俞仲寬之諄切勸戒俾民實能感悟遵行其造福不已多耶

府志

宋淳熙五年戊戌八月乙未劉彥集嶽卿純叟廖子晦朱仲晦來晦翁在武夷山響聲巖題名馮志云是年朱子年四十九歲差知南康軍辭不

允降旨速之任見年譜詩集有陪彥集充父同游瑞巖詩子晦名德明
順昌人 福建金石志

宋咸淳癸酉季春望日延平廖邦傑以度節行鄉部艤舟鼓山詣祝聖所
申虎拜之恭因登大頂峯三山趙時汭莆田鄭希點莆田葉渙合沙曾
璫從住山正凝東山慧昌北山明鑑在鼓山題名陳略云在龍頭泉石
邦傑字懷英順昌人時以師參攝軍事趙時汭魏王廷美八世孫鄭希
點咸淳元年進士官太學博士葉煥嘉定十三年特奏名正凝見鼓山

志 福建金石志按癸酉係咸淳九年

順昌縣志

卷二十四

舊志小序

順爲望邑斗女星躔兩水夾鏡雙峯峙天佳氣蔥鬱淳風綿延矧邁盛世
聲教敷宣祥和所扇沴戾斯蠲憑眺都鄙輝山媚川扶輿鞏固億萬斯年
志地輿第一

國家興建一本於民金湯鞏固具見皇仁於鑠類璧敦化明倫夏絃春誦
郁郁彬彬建坊樹表俗茂風淳恭惟祝聖邸第輪囷瞻雲就日莫不尊親
志建置第二

維王入政食貨其首惠商通工耕三餘九古重民數拜版而任土作貢於
此蓄畝水陸錯陳滋豐孔阜穀我士女以羞黃耆土物是愛珍奇不有盛
世擗節鉅細胥剖志食貨第三

龍紀鳥紀爰立百官曰令曰長撫字其難繭絲保障治匪一端是偕丞尉
師儒盤桓恪供厥職恥厲素餐茂績丕著斯其不刊報以俎豆神靈所安

順昌縣志

卷二十四

三

言念往訓酌猛劑寬志職官第四

鬱葱豸麓激灑龍湖氣鍾清淑實產名儒書升孝秀厥有訐謨三載賓興
何天之衢經明行修蔚爲時需寵光先代榮及妻孥何以報國敢曰身圖
勗哉多士永念勿渝志選舉第五

蔚爲人望示我宏規勸崑有守廟堂有爲昏旦溫清伯仲壘篋於物有濟
惟善是資至於僑寓間亦魁竒曰學曰仕簡策昭垂挺生傑出冠絕一時
賴茲型典風教主持志人物第六

淑順其身柔嘉其德不幸之遭乃見節烈之死靡他完貞無缺天地震怒
鬼神飲血亦有孤芳懷清履潔闡顯幽微衆口一說雖乏表揚王氣盤結
留照翰青歷劫不滅志列女第七

經天緯地厥有文章仰止前哲寥落羹牆斷碑風雨亦載艷香吟風弄月
是日縹緗偶爾濡毫逸韻鏗鏘詎云不朽亦茲土光匪惟游藝法戒攸彰

勗哉文學奕禩流芳志藝文第八

志取乎醇匪曰誇多拾遺補闕如網斯羅紀灾紀祥異旨殊科一歸於正
意更靡他亦有勝蹟槃陸澗阿古今興廢可泣可歌義取皆備如羹斯和
憶事博物千秋不磨志拾遺第九

淫祀非福異教多戾正直聰明爰祝爰祭亦有靈臺風月光霽山巔水湄
高蹇遠逝玉館瑤樓以遊以憇蓮社鐘鳴緱山鶴唳憫茲編氓情牽慾繫
設此神道具曰醒世志方外第十

順昌縣志

卷二十四

四

明庚辰舊志序

修撰舒芬南昌人

志亦史也曰府縣志者列國史也或曰志者史之一非也志天文分野即天文志也志祥異即五行志也志疆域山川城池橋梁即地理志也志士田貢賦即溝洫志也志列宦人物列女之類即列傳志也志詞章即藝文志也志選舉即選舉志也而其大者志風俗之淳澆志戶口之增耗則君德世道之所關非本紀世家之流邪故作志者非有見於道而備作史之才未見志之善也曰前輩言經載道史載事雖作史於道何取邪曰道者事之本事者道之充未有不本於道而能善其事者故事即道也史亦經也易詩書禮樂五帝三王之史也春秋五伯之史也其事異則其文異而載道則無異也故志之作亦大矣苟有大其事而進之者則以皇上之聰明睿知觀天文祥異有不起敬畏者乎觀山川城池有不思保守者乎觀風俗戶口有不念治教者乎觀列宦人物有不務親賢者乎觀詞章藝文有不感九歌之勸極之敷言者乎故曰作志者非有見於道而備作史之才未見志之善也正德歲庚辰予奔先君喪過順昌其令馬侯進之甫來弔俄而溪漲不得去侯來慰因坐語曰予以政暇得作志願一言序之然今日未敢以請明年五月果以典史杜君洪爲予鄉使械志來予惟侯學術純正而其材器固非百里治效所可窺測是志乃其餘事然文理密察而略無所苟非予所謂有見於道者邪乃爲之序

明丙子舊志序

按此序應改錄馬序後

邑令舒

俸

臨川人

夫志也者記也記一邑之事以詔示於無窮者也惟在信而可傳故乘載之疎陋無章者其失則俚組織之過浮無實者其失則誕非信志也不信不可傳矣順昌舊有縣志修於先尹碧溪馬公性魯文質具備可傳者在是於今六十餘年矣梓刻久湮篇簡殘落以一邑據信之文而漫無可考非所以垂鑒戒而風後來長令者之責也直道之在天下不可一日不明

順昌縣志

卷二十四

五

則是志誠不可使久蝕無傳矣予目覩而心竊憫焉記籍無存則百姓日用何由觀感以興蒞事一年廢墜漸舉舊志欲補修焉貲用告匱而耆里士民謀欲增新而具呈請者則日至因是乃謀諸庠士之彥者僉曰斯舉也立政之紀也不可墜也繼謀諸鄉先生而文者僉曰斯舉也存教之大也不可泯也又繼而謀諸學博諸君僉曰斯舉也寓教化轉移之機是究其所用心必有志於當務而非徒爲文具也已矣遂命僚屬督工而鉅梓焉舊志之朽蠹者新之字畫之明辨可讀者存之天文地理之有常者紀之橋梁廨署燬蕩不常者紀之供貢征斂古今沿革異制者紀之列宦選舉名職不一者紀之節義文章篤行隱逸足以礪鈍者紀之而其大者風俗之淳澆戶口之增耗則又必加詳而未嘗略焉舊志城邑有圖儒學新遷西郭外亦且圖若四鄉之圖說則總其里之山川姓氏戶口物產寺院

順昌縣志

卷二十四

雜錄

六

墳宅惟甚備展圖覽閱若指諸掌是則昔之所無而爲今之新增也採訪叅訂合衆見以爲同要公是以爲的務在信而可傳其所不可傳者殆確乎其不易而無所徇也刻成凡與事於志者又喟然而嘆曰是刻也雖紀順之事也實治順之道於無窮也是爲序

明辛巳舊志序

邑令馬性魯

始余至順昌視篆予嘗閱舊志病其義類不倫統紀不明欲時訂正未遑旣閱歲暇日首命諸生知文者翻檢舊載益以見聞彙萃成草繼屬學僚編次成冊筆削隱括予實僭之幾兩月脫藁佐幕輩遂督工鉅梓圖永厥傳謂予當叙諸首簡乃言曰縣志一邑史也作志亦一家史法也曷謂史制度關焉名物係焉監戒寓焉可苟缺耶曷謂史法疎則弗備弗備奚以稽冗則弗精弗精奚以觀誕則弗信弗信奚以傳若苟作耶此昔之所以爲病今之所以改作也執筆者又可不慎與是故叙事必詳非以誇多也

修辭必嚴非以立異也考究必真非以求全也惟務去其疎冗及誕之病具一邑文事云爾自視殊歛然恐後之視今亦猶今之視昔也若謂必備必精必信擬諸史家筆法則予豈敢雖然古今畢錄制度具矣巨細不遺名物悉矣美惡並存監戒昭矣時勢以判損益之機著矣利弊以形興革之宜審矣統紀固有所居辭義固有所載不識有可稽可觀可傳與否後之有事於茲土者幸不置諸覆瓿時或展覽探其端究其歸參互斟酌以時措之亦庶乎爲政之一助也若夫讀其書也考其跡也而勸感興起以之則於茲土之士庶或亦未必無小補云然則茲志也謂之一邑史固可也豈真文具哉

清癸亥舊志序

巡撫金 鉉

國有史四方有志其揆一也顧史以編年紀事法取乎彰善癉惡必兼才學識三長方克有濟若志止叙其山川城郭建置沿革風土產物不過因

順昌縣志

卷二十四

雜錄

七

事直書他若名宦人文列女亦多褒鮮刺似史難而志易然而志爲史之先資志者一方之史史者天下之志也是故史有輿地志亦有輿地乃史止及名山大川而志則峯巖石峽溪沼灘池無不備載是詳略不侔也史有食貨志亦有食貨乃史止及戶口田賦而志則鹽鈔魚課草木禽獸無不畢登是繁簡不侔也史有列傳志亦有列傳乃史止及貴官大僚而志則孤芳幽德販夫牧婦無不盡探是顯微不侔也史有藝文志亦有藝文乃史止及名疏碩議而志則論序碑銘詩賦傳記無不編輯是巨細不也非才足以華國則著選不精非學足以博物則考核不當餘識足以邁羣則去取不公故修志之難與修史等 聖天子崇尚文治四海同風旣命文學諸臣編摩史館復以東漸西被疆域之廣前古未聞爰有一統通志之命猗歟休哉閩自無諸啓疆數千年來山川之奇麗風物之淳良人文之英秀實爲東南奧區明時郡邑雖各有志或存或亡通省旣無全書

鼎建以後草創未遑嗣因兵燹洊至郡邑志殘缺失次蕩無可稽故閩志較他省獨難又藉我 皇上神武削平逆窟臺灣數千里舉國內附開闢以來未奉約束之遐陬絕域一旦盡入版圖豈非極盛故閩志較他省更偉余凜奉簡書惴惴懼弗襄事爰與馬方伯商榷聘鄉先生二公總其綱名士十餘子分其任至南劍一郡則屬之順邑薦紳何君余竊自念志雖有可無否必所可者盡合乎人心之公則哀鉞寓其中矣輒與諸君子相訂凡所謂名宦必豐功厚德浹洽人心愛留棠樹淚墮羊碑者然後入不然弗敢也凡所謂鄉賢必懿行高風維持名教彥方剛介太邱寬和者然弗敢也凡所謂列女必苦節幽貞敦厲末俗青陵載咏柏舟興歌者然後入不然弗敢也閱數月而稿成又閱數月而刊竣離離然質有其文諸君子信良史才余藉光不朽矣抑余有說焉通志之作也非徒博洽舊聞原爲勸戒人心計也吾願後之讀是編者睹封域之廣大當思所以保圉慎固之永無伏莽之患乎睹風土之殷繁當思所以生聚樂育之永無杼軸之嗟乎苟一端之可議位雖高而弗傳則司牧者當思自奮矣苟細行之不矜名雖盛而弗錄則懷芳者當思自勉矣庶無負 皇上風厲海內之德意及余與諸君子繩繩祇慎之心余實有厚望焉若夫鞏固皇圖永永踵事增華是所望於來者

清己丑舊志序

巡撫 張伯行 儀封人

順昌縣志

卷二十四

雜錄

八

粵稽文以載道史以傳經志以法史如日月之經天如江河之行地將與天地無窮極也儒者生千百世之後而欲考千百世以上之事其近而足徵者莫如地志然非文足以闡道而折衷於經史未足以示信余向讀書中秘恒晤史館諸名公相與往復議論因知錯綜而采擇者視各省地志而詳略差異凡志書所未紀則史多闕文及余出宦江南馳驅周道鞅掌風塵唯兢兢民生吏治懼鮮當也歲丁亥奉命撫循於閩蓋三年矣朝考

夕糾案牘之餘每念 皇上勤思懋學時出睿評談經至於夜分特命詞臣彙輯二十一史近復慎簡廷臣纂修一統志余方欲彙編閩省通志以仰答 聖天子稽古右文至意而任重事繁是以有志未逮也今年季冬計典既竣五經生員黃宣來謁以觀察使陳君秋厓所修順昌縣志請叙於余余喜其適愜余之志也爰受而覽之慨然嘆曰是非徒一邑之志也先王命大史陳詩以觀民風而行人所至遍覽十五國之風土人情卽至一名一物盡成文章閩地僻處南徼自乾道以來爲有宋諸儒講道論學之鄉順昌介江西邵武之衝蔚爲延平諸邑弁冕今其簡編具在政事垂焉人物釐焉褒貶寓焉法戒昭焉紀載備焉而大者誅亂賊於旣死正名分於當時使禮義儒先之雅忠孝節烈之氣長流於天壤間余惟陳君文足以載道表千百年未彰之緒剖潛德之幽光是不獨有裨於聲教其有補於經史豈淺鮮哉再稽閩地當西漢之際草昧初開唐觀察常袞來而

順昌縣志

卷二十四

雜錄

九

民始知學厥後人文日盛迄今千載不猶想見其流風餘韻今又安得不以不朽之盛事期於陳君君將倡率所屬郡邑存文獻以光盛典然則覩斯編者豈徒曰一邑之信史哉實寓我朝廷久道化成之意於無窮也其益勉旃珥筆彤庭鴻篇鉅纂此其明徵矣

清乙酉舊志序

巡撫定 長

司土者舉所司事無纖鉅宜周知旣周知矣且籍而記之使近有所守遠有所法蓋莫善於志斯固從政之大端匪第以其文已也余奉命撫全閩恆常覽諸郡邑志近復續修通志絜提綱要甄綜成書實以邑志爲權輿焉頃順昌陳令適以新成邑志來請序余惟邑爲延屬之望舊志稱置縣昉自南唐時後漢乾祐元年本永順場改從今名然考十國春秋閩永隆二年王延政取永平順昌二城是年爲晉天福五年則名縣不自南唐始矣跡其山川秀發名賢輩出稽諸簡冊端緒足徵至於正域度原則壤鳩

賦物土宜而考風俗亦掌錄所必及焉顏師古曰志記也積記其事也事日積而日多法制存於斯卽經畫存於斯第謂補葺舊聞若無與於治理然匪留意治理者有能周知而籍記之也哉陳令可謂能舉其職矣考邑志先明屢有纂述國朝康熙己丑之志中丞儀封張清恪公序之越五十餘年而余獲覩新志之成曩篇具在前哲可師遂不辭而爲之序

清乙酉舊志序

學政王杰

順昌山祖華陽而宗豸角九龍五馬貴人君子諸峯之秀盤錯其間水則西源邵武東源將樂合流入十里會沙縣而注劍溪延屬勝區也歎欲精靈篤生賢豪槎溪高峯兩先生前後羽翼龜山紫陽並興儒教元明以來代不乏人至我朝而名賢鼎盛蓋聖化涵濡日久崇山峻嶺比屋絃歌而地方大吏及良有司之培養作新非一日矣余奉命來閩初覽省志已得其概顧未得邑乘而詳考之迨試事將畢邑令陳君適新其舊志以示次

順昌縣志

卷二十四

雜錄

十

第檢閱益得其山川人物職官選舉之詳而陳君之從容布政尤可觀焉夫志者考己往以鑑將來也司民社者倘於興廢因革諸務利弊所關闕焉勿講而沾沾裒輯成書鋪張粉飾於國政何裨今陳君相度土宜修廢舉墜五年間民風士氣奮然作興然後以游刃餘閒釐訂編摩用以壽棗梨而光文獻今所載橋梁道路皆昔日戴星出入所經營而規畫也所列田疇都鄙皆昔日越阡度陌所巡行而周覽也所紀宮牆祠廟皆昔日躬親丹雘爲士民興教而祈福者也其尤盛者萬壽宮成崇壯閎麗宣綸言之赫濯祝聖福以無疆俾閭里小民肅然觀聽由是圖之載籍日月同光陳君之爲政可不謂知所先後識其本末者與今之世大順之世也順昌之名傳之自古順昌之風俗教化益茂於今且得賢尹而鼓勵之雖以希風淳古追美華封亦奚難哉因爲序而兼以望之

清乙酉舊志序

延建邵道孫孝愉

志也者舉全邑一切應載之事無不筆之於書以上著聖朝一統車書之盛而下備輜軒之所採擇且使宰是邑者周知一邑之情形以爲出治宜民之本卽凡有察吏之責者亦可因是以鑒其得失考其賢否也余恭膺簡命備位監司所屬郡邑吏治旣爲留心咨訪而於其修志之舉亦樂得而考其成焉順昌爲閩延平郡望邑宋楊時稱延平山川清明偉麗爲東南最黃裳亦謂延溪山之雄當水路之會順昌介其西稽其志修於康熙己丑後此剗缺如以全邑紀載之事閱六十餘年其間豈無轉移更易或增或減者而竟聽其殘缺不修宰是邑者將何以爲考鏡之資乎今邑令西寧陳君慨然起而重葺之旣成請序於余余惟志之修無非信今傳後以昭垂於無窮而已今是書叅酌舊志缺者補之繁者刪之訛誤者訂正之湮沒者表彰之爲地輿爲建置爲食貨爲職官爲選舉爲人物名宦列女以及藝文之富古蹟名勝之類靡不瞭如指掌庶幾詳而不略確而

順昌縣志

卷二十四

雜錄

十一

不浮眞而不誕矣乎則此一志也非徒一邑記事之書蓋作宰者可視此以爲治而察吏者亦可視此以覘其治矣記有之修其教不易其俗齊其政不易其宜然則一邑政教之施必隨乎邑之俗與宜而不可有所拂亦不可有所強無所強無所拂則政與教胥與民相安而政無不行教無不從於以求一邑之治而課最循良或無難也是爲序

清乙酉舊志序

邑令陳瑛

蒞官之地必先修志子朱子嘗言之矣余茲於順志若獨後之匪乖曩訓也政固有其序權其輕重緩急次第布之事始克舉而民以不擾余甫蒞茲土覽其溪山之秀麗人物之豐繁方且慨然思咸與維新寧掌故之衰輯維艱顧治具初張民志未孚驟期更化慮弗許也且順固尤有切於此者其躬行慶典宣示王言所以凜恪恭而肅觀聽者未極規製之隆也丹碧剝落殿宇就圯所以峻宮墻馨俎豆而尊顯聖道者未盡輝煌也乃布

之遺金錢之錫弗克追先哲之流韻其露襟肘而談詩書者膏火不繼懼
士氣之黯沮而學殖中落也凡爲吾民捍災禦患及有功名教者尙廟貌
之弗整也其亭臺樓閣有關邑之形勝者未覩其排丹嶂矗青霄也行李
之往來涉則猶病道則猶第也諸務之未遑而汲汲惟編摩是圖是猶粗
糲弗克屬飫珍錯鶉結藍縷之尙恥欲蒙繡縠以章身也不且議及粉飾
一切而非所以崇實效歟比來五年於茲飲冰茹蘖星霜四野萑苻鮮警
肺石罕投終歲不斷死刑凡邑之廢墜者惟茲邑人之起而懲慝亦且以
次具舉夫旣先其所甚切則其非甚切而實切焉者亦可徐起而圖矣如
是而邑乘之修其又烏可已哉茲逢各大憲仰承 聖天子稽古右文之
治徵取邑乘纂修郡志以彙一省之通志順爲望邑曩故有志而此窳簡
略觀者病焉且曠今六十餘年其間名區勝蹟魁人傑士湮沒不彰者何
可勝道夫考鏡無資張弛奚賴今方求益修吾政以紓吾民而於志乘徵

順昌縣志

卷二十四

雜錄

十二

信之書顧獨闕焉是猶未竟之責也於是始進都人士謀所以新順志者
乃明經張君奇堯毅然請捐己貲獨肩其事余固嘉其志且以邑之敦善
行不怠而相與成厥美者一時後先輝映爲可幸也是役也以甲申之十
一月而戒事乙酉之五月而竣事雖不敢云考核精嚴而義例較舊志頗
爲詳密所謂若網在綱有條不紊其殆庶幾乎是爲序

清癸亥舊志跋

謝鍾瑾 邑人

志者史也史起龍門司馬遷繼父談作史記兩漢書因之及易書爲誌則
自班始誌與史皆所以編年紀事昭茲來許不可日久而弗修也瑾幼承
吾祖禹門公之訓每讀書之餘示以邑志謂某爲名臣某爲孝子某登賢
書某成節義志之所紀昭然與日月爭光讀之匪以通一邑山川人物選
舉之詳實足爲修身踐言之資也瑾不敏不能爭自濯磨爭光史乘而邑
志之修欣慕久之當乙酉張君奇堯捐貲重修之歲瑾從新亭葉夫子遊

卽心焉嚮往迨後閱志於地輿一冊知後河之址山水交集爰建草塘課
讀其間每晨夕靜坐討論舊志竊見篇章散佚字句訛舛心滋戚焉且自
乙酉迄今四十年矣其中文物志美災祥紀異所急宜增補者尤多修之
烏容緩哉歲辛酉并華許邑侯蒞茲土首卽以修志爲務特謀工費之難
其人也瑾因出而獨任之正在纂輯間而許侯適丁艱未舉署篆者爲南
一張邑侯於修志之念欣然若合符節先後輝映此舉遂成唯時載筆者
許邑侯也瑾輩相與稽考旁參博采以供筆削而猶恐其或有遺逸新邑
侯歐陽復示諭遍訪搜羅殆盡其尙有微而不闡幽而不彰者乎楊升菴
曰史記所以獨絕千古非獨太史公筆力最優亦由上下數千載哀集左
氏國語等書及漢代司馬東方鄒枚董賈諸名人大文章以爲楨幹今許
邑侯學擅三長識參遷固合一邑之人心成百年之信志釐訂之餘明允
至當較之前志詳焉洵可以行世而傳後豈以誇多鬪靡侈一邑之鉅觀
爲跋

順昌縣志

卷二十四

雜錄

十三

云爾哉是書作於嘉慶七年冬成於八年陽春月始終本末不容略也是
爲跋

清癸亥舊志跋

何純子 邑人

誌一史也一日之筆千古之鑑是故作者難而述者匪易然史原本於春
秋發明於綱目善讀者了然於正閏之殊貞邪之分若志不無見聞未確
論辨非真以私廢公浮靡鮮實故史不可朽而志必屢修向承蕭華宇公
遺以舒志殘缺有間歲己亥觀察孔公纂修郡乘邑人無一與者故缺略
尤甚茲奉會省纂修彙爲一統志誠千載一時也中丞金公檄郡邑徵聘
名宿予不敏濫充赴館爰將所存殘帙晨夕討論搜求遺逸纖悉靡遺中
有錯誤亟爲改晰釐正悉照通志編次爲卷有十以彙附目無有缺焉然
一人之見聞有限百年之事實多端誠恐得一漏十不無遺憾咎所難辭
若夫以私廢公冒濫浮飾庶可自矢以告當時之同聲以俟來茲之有識

云爾

清壬辰舊志序

邑令 賈懋功 山右人

周禮設官分職必曰體國經野以為民極蓋以民風土俗因地制宜不得其宜則其地不可得而治然不考諸志乘則無由悉其詳余宦遊十餘載久在畿輔凡南方一切風氣殊乏見聞辛卯夏五月選授斯邑竊以為人地生疎慮其地之猝難圖治也比視事以來訪知風俗崇尚節儉民性淳良竊幸尚易為之顧一切典章制度山川人物唯邑志載其詳亟欲考監焉以資治理查順邑之志自乾隆三十年修後至嘉慶八年許君廷梧慮其年湮世遠文獻無徵議重刊之時邑紳謝君鍾瑾獨任其貲纂修參訂分任邑中諸君子凡七閱月而告成道光八年十有一月大府議修通志設局省垣檄飭各屬彙集成書送局纂訂歷經前政陸沅薌孫召棠諸公著有成議余適踵其後沅薌告於余曰是書之成也嘉慶八年出自謝君

順昌縣志

卷二十四

雜錄

十四

鍾瑾之手茲其子種藍克成父志復集其家五房叔姪仔肩之瑾已約略成帙而計自重修以來越今又二十餘年矣特恐採訪未周尚多散佚故未告厥成功子其圖之余應曰唯後與邑中諸君子聚議廣為搜羅分門別類凡歷年職官科名節孝有應新增者悉探而錄之期無遺憾壬辰仲春種藍胞叔謝君鍾瑤以成書乞序於余余處此易治之地愧無宰治之術亦曷足為之序哉但閱是書所載山川形勢秀麗宜人自唐宋以至我朝人文蔚起煌煌乎一大觀也爰書數言以弁諸首是為序

清庚辰重刊舊志序

邑令 吳恩慶 江蘇吳縣人

歲庚辰二月予奉檄來攝縣篆甫下車即購志乘而不可得謂板毀於兵久之始有假自廖明經信中家中者予乃受而讀之蓋尚係道光壬辰年所刊修者也當此之時民物熙皞風俗茂美故其為宰者久道化成政無不舉乃得與二三耆耄訂修明何其幸也今則兵燹迭經山川猶是也而

黎獻無存矣城郭猶是也而人民已非矣流亡雖復而土客冗雜之無分田賦雖釐而豪強兼并之莫止其所以鋤梗安良休養生息正有什佰急於此者顧獨志書一事乎哉雖然今之爲宰者非昔比矣或期年而去焉或不期年而亦去焉使復玩噉因循將年愈遠事愈湮並此碩果僅存者亦不可復得不重滋之咎耶乃捐貲就原板先行重刊而誌其緣起如是其餘言行增補者並舉邑之公正紳士詳爲採訪以待集貲續刊予且樂觀厥成也

清壬午重刊舊志序

邑令 管辰辰 江蘇常熟

邑有志乘將使信於今傳於後上以顯盛世涵濡之化下以徵編氓興起之由也順邑舊有志矣道光壬辰間重加纂訂曠今五十餘年盛衰得失變易者不知凡幾風俗政治沿革者不知凡幾忠孝節烈湮沒者尤不知凡幾兵火洊遭星霜遞換設不及時修輯聽其蕪漫而散佚宰斯土者之

順昌縣志

卷二十四

雜錄

十五

咎也抑亦生斯土者之羞也歲辛巳春余奉簡命來治拜篆後卽覓志乘不可得前政吳君子述告余曰順邑自赭寇竄擾闔城焦土而志板毀於兵今僅於廖明經信中家假獲舊本盍先照繕付鈔至於釐舊編新則濡筆有待焉子其圖之余應曰唯唯於是進都人士謀所以新順志者廖紳貢三先捐貲爲倡諸君子亦忻忻然請余示諭城鄉俾各就其見聞所及開具姓名事實隨時報聞庶幾楊幽光於珉石姓氏皆香訪軼事於耆黎歌謠亦韻順邑雖編小其中文物紀美災祥誌異五十年來所闕焉弗講者胥於案牘餘閒而摻羅徧及乎迺不期年而余又將奉調去爰將集貲百餘緡郵寄吳君重鑄舊板並留半移交以備刷印需也噫鞅掌風塵一官傳舍輪蹄歲月再至何年區區斯志之增修猶不獲及我身以戴事焉而其他廢墜之舉尙何言哉然諸君子生長是邦而果留心采訪俾後來者得甄綜而援筆也文獻重光後先輝映余猶得拭目觀成矣而能無望

歟

清癸未重刊舊志序

邑令沈受謙

溯是編之纂訂己五十二年矣自咸豐年間慘遭兵燹其間或因或創有廢有興民情隨風氣爲轉移法制因時宜而通變殉節義者祀重昭忠他如孝友可風訪求宣徧被蹂躪者事在善後前此繪圖可按註說宜詳若當此而釐訂無人恐歷久而傳聞鮮據予權篆斯邑正欲得舊本而稽考之延耆宿而商榷之適前政吳司馬紫述以重鑄書板郵寄予卽刷印成函謂剝蝕之殘編重新梨棗俾有志纂修者得踵其後因與華陽六賢兩書院掌教廖明經墨香張明經以成及廖紳品齋暨各鄉聯紳語曰諸君子殫見洽聞纂修志乘非異人任其勿視爲緩圖僉曰唯唯予雪泥鴻爪未能手告厥成願大君子爲之蕝事焉

按以上庚辰壬午癸未皆係重刊舊志各增一序並未纂修姑錄於

順昌縣志

卷二十四

雜錄

十六

後以見修志之不易也

續修邑志叙略

吳述之邑人

述之譴陋庸才丁衰殘暮景精力疲憊學植久荒謬蒙高承光少航兩先生推舉任以編摩之職私衷自問深慚知識迂疎搜羅或漏蚊負滋懼蠹測貽譏祇以力辭未獲不得不冒昧承乏僑居城中以勸厥事屈指五載始行竣事查我邑志書其間山川人物職官科名節孝碩彥前哲分門別類釐訂井然咸豐間洪楊亂後幾歷七十餘年之久未經修輯山川城郭仍復如是而人民田賦風俗政治大非昔比前輩明經高君諱聯梯廖君諱上林等屢擬重行修輯奈苦於兵燹之餘元氣未復地瘠民貧經費難籌僅得與縣令吳恩慶管辰辰磋商搜集舊志原板重刊印刷以保存先代之文獻其用意抑何深且遠也民國肇興經省議會建議咨請省長輯修通志飭各縣修輯成帙送省鑑定庚申夏季迺蒙建安道尹蔡鏡湖迭

令嚴催適是年邑令徐叔賓蒞任茲土督促設局開辦舉高君登鯉為總纂高君世恩高君登艇游君德仁徐君建侯廖君克義為分纂差幸相與發潛闡幽考同證異狐得腋而成裘蝦借目以為視不至出言無稽附不朽之列是為述

據採訪冊云吳述之續修邑志已脫稿未付梓嗣因赤匪擾亂全稿遺失僅存略一篇錄附志末

順昌縣志

卷二十四

雜錄

十七

道光壬辰舊志目錄

卷之一

地輿志

星野

疆域

山川

風俗

卷之二

建置志

城池

學校

公署

書院

卷之三

食貨志

戶口

田賦

物產

卷之四

職官志

秩官

名宦

宦蹟

卷之五

選舉志

進士

舉人

貢生

職監

薦辟

卷之六

順昌縣志

卷二十四

雜錄

十八

人物志

卷之七

列女志

貞烈

節孝

卷之八

藝文志

序記

文碑

誌銘

詩

卷之九

拾遺志

古蹟

名勝

祥異

宅墓

卷之十

方外志

祠廟

寺觀

仙釋

壬辰舊志纂修姓氏

總裁

陸嗣淵

邑令浙江平湖進士

孫化南

邑令四川萬縣拔貢

賈懋功

邑令山西夏縣進士

分輯

游全通 邑舉人

廖宗城 邑舉人

廖廕仕 邑歲貢

吳世僖 邑歲貢

謝蔚藍 邑拔貢

蔡純平 邑歲貢

參訂

陳春鼎 邑拔貢

余廷憲 邑舉人

游全迪 邑廩貢

林春仁 邑廩貢

謝鍾藍 邑附貢

陳春榜 邑歲貢

校對

謝鍾珫 邑貢生

盧祝祺 邑廩生

謝青藍 邑廩生

謄錄

謝植藍 邑增生

呂朝紀 邑生員

蔡純盥 邑生員

監刊

謝潤藍 邑生員

謝瑞藍 候選從九

謝碧藍 候選從九

順昌縣志

卷二十四

雜錄

順昌縣志校勘表

卷別	頁數	行數	數字	誤	正	卷別	頁數	行數	數字	誤	正		
凡例	三	十六	廿六	舊字	刪	卷二	五	十一	十八	興	與		
目錄	二	十六	十四	明字	刪	卷一	五	十五		本行應低一格			
	二	十六	十七	清字	刪		六	十二	十三	銀	鎮		
	二	十六	十二				九	十	十七	郎	朗		
卷一	一	十六	廿一	順下	落場	卷一	十	九	十六	境	字	刪	
	六	四	廿六	獵	臘	卷三	二	八	廿一	冲	水	水	冲
卷二	一	十九	二	曙下	落色		三	二	十二	后	下	落	爲
	三	一		本行	應低一格	卷四	五	八	四	日	目		
	四	八	十二	戀	巒		五	十七	廿三	之	稱	稱	之
	四	廿一	廿七	高下	落思		七	十八	十一	圮	祀		
順昌縣志校勘表													
卷別	頁數	行數	數字	誤	正	卷別	頁數	行數	數字	誤	正		
卷四	八	十八	十九	絹	綃	卷七	四	廿三	十三	間	字	刪	
	十	廿二	二	勒	勅		五	十五	十三	願	願		
卷五	四	十二		本行	應低一格 用小字夾行		七	十五	廿一	之	役	役	之
卷六	一	四	十一	而	始		七	十八	十九	餓	餘		
	二	一	廿六	思	不	卷八	一	二十		本行	應低一格		
	五	九	十五	眷	脊		四	六	十七	秒	抄		
	九	四	廿一	婆	姿		四	十二	十二	秒	抄		
	十二	七	九	丈	文		四	十四	廿四	秒	抄		
	十四	十五	二	蜓	蜓		四	十五	廿二	秒	抄		
卷七	四	六	六	域	城		十五	十三	廿一	下	不		
	四	十五	十三	圍	園	卷九	二	十七	廿二	往	住		

順昌縣志校勘表

卷別	頁數	行數	數字	誤	正	卷別	頁數	行數	數字	誤	正
卷五十	廿五	十三	七	任字	刪	卷七十	廿四	七	一	中字	刪
	廿六	八	二	警	澤		卅四	十八	三	建	延
	廿七	廿三	十三	旅	長	卷八十	五	二十	廿八	御	銜
	廿八	二	五	防駐	防		十	廿二	十七	御	銜
卷六十	一	廿三	三	哥	奇		十二	十八	廿二	積	績
	二	十六	廿六	伴	泮	卷九十	二十	二十	十八	祐	祐
	三	二	廿四	樸	撲	卷十二	五	二	十五	率	卒
	四	十八	廿八	養字	刪		十五	六	四	撫	為
卷七十	十	廿二	四	暑	署		十五	十	十二	密	蜜
	十一	四	一	本夾行應	低一格		十五	十一	廿七	番	番
	十二	三	三	司下	落主	卷二十	四	十一	三	本行應	低一格
卷二十	四	十六	四	本行應	低一格	卷三十	六	廿三	廿七	知字	刪
	四	十八	一	本行應	低一格	卷四十	一	三	四	時下	落將
	四	廿四	一	本行應	低一格		一	三	十五	第	弟
	四	廿三	三	郡	邵		三	八	廿三	而	下落受
	五	二	一	本行應	低一格		七	十九	廿七	不	下缺伴
	五	八	七	本行應	低一格		七	二十	廿四	餘	非
	五	十二	八	鈎	純純鈎		十四	廿四	八	者	下落宿
	十六	十六	一	本行應	低一格		十五	十八	十三	楊	揚
卷三十	三	十五	廿二	醮	譙		十六	五	八	宣	宜
	三	十六	廿二	醮	譙		十七	四	十一	存	下缺叙